

Supervizor imenuje šefa Policije Brčko Distrikta

Danas je supervizor za Brčko Distrikt, Henry L. Clarke, imenovao Milenka Miličevića za šefa Policije Brčko Distrikta. Gospodin Miličević je imenovan na period od četiri godine, uz mogućnost produženja na još jedan četvorogodišnji mandat.

Gospodin Miličević je jednoglasno predložen za ovo mjesto od strane Nezavisnog odbora za razmatranje prijave i izbor kandidata. Odbor čine predsjednik Pravosudne komisije Brčkog, javni tužilac, viši policijski službenici iz Bijeljine, Orašja i Tuzle, šef Centra za mentalno zdravlje pri Odjelu za zdravstvo, i predstavnik supervizora. Komandir Policijske misije Evropske unije (EUPM) za Brčko učestvovao je kao posmatrač. Odbor je razmatrao 30 prijave i izabrao 4 kandidata za razgovor. Gospodin Miličević pokazao se kao najkvalifikovaniji kandidat, te je njegovo ime upućeno Skupštini Brčkog za davanje saglasnosti.

Nakon napada u štampi usmjerenih protiv djelovanja gospodina Miličevića tokom nedavnog rata, Skupština Brčkog je odložila glasanje. Srpski poslanici su se sastali sa supervizorom, i nekoliko njih je izrazilo zabrinutost da Srbi u Brčkom neće dati podršku gospodinu Miličeviću, bez obzira na to da li su navodi iz štampe istiniti ili ne. Na zahtjev supervizora, Skupština je pozvala gospodina Miličevića na radni sastanak na kojem su poslanici imali priliku da mu postave pitanja. Gospodin Miličević je odbacio optužbe protiv njega: nije iznijet nijedan dokaz koji potvrđuje ove optužbe. Gospodin Miličević je dobio sertifikat od Operativnih snaga međunarodne policije (IPTF), a Međunarodni krivični sud za bivšu Jugoslaviju nije dostavio nikakve negativne informacije o njemu.

Ipak, na skupštinskom glasanju 7. februara srpski poslanici

nisu dali svoju saglasnost. Dobio je 15 od 28 glasova, što je nedovoljno za tropetinsku većinu.

Nezavisni odbor za razmatranje prijava i izbor kandidata sastao sa supervizorom 14. februara 2003. godine, i ponovo svesrdno preporučio gospodina Miličevića kao daleko najkvalifikovanijeg kandidata. Odbor je odbio da preporuča alternativu. Članovi odbora i supervizor su se složili da bi, ukoliko Skupština iznese ozbiljne dokaze protiv gospodina Miličevića, oni ponovo razmotrili svoju odluku, ali da odluka odbora ne treba da se mijenja zbog nepotkrijepljenih spekulacija iz štampe. Stoga je supervizor imenovao gospodina Miličevića za novog šefa Policije.

Supevizor Clarke je iznio sljedeći komentar: "Brčko Distriktu je prijeko potreban iskusan i profesionalan šef Policije. Gospodin Miličević očigledno ispunjava taj standard. Svrha postupka izdavanja skupštinske saglasnosti bila je da proširi krug učesnika u razmatranju, te da razmatranje otvori za komentar javnosti. Međutim, takav demokratski proces ne može funkcionisati ukoliko članovi zakonodavne vlasti dozvole sebi da se okrenu protiv nekog kandidata na osnovu nepotkrijepljenih glasina i neosnovanih napada na njegovu ličnost. Naprotiv, kao i svi drugi u tom procesu, zakonodavci moraju tragati za istinom. Njihovo davanje saglasnosti nije ni u jednom trenutku bilo usmjereno na opstruiranje procesa izbora apolitičnog, profesionalnog šefa Policije."

"Brčko sebi ne smije dozvoliti da ima drugorazredne, ispolitizovane policijske snage. Da bi se pobijedio organizovani kriminal i otkrio ozbiljan privredni kriminal, potrebna je stručnost a ne politika. Moramo imati policijske snage koje zadovoljavaju dovoljno visoke profesionalne standarde, koji podržavaju naše profesionalno, nezavisno sudstvo, te provode naše savremene zakone."

"Brčko Distrikt je spreman za sljedeći korak koji ide dalje od multietničkih policijskih snaga – a to je zajednica u kojoj će

svaki građanin ili stanovnik biti tretiran sa istim dostojanstvom, bez obzira na etničku ili političku pripadnost. Takođe očekujem da se svaki pojedinac na isti način odnosi prema članovima policijskih snaga, od novog šefa policije do najmlađeg policajca.”